

Osterøy kommune

v/Hege Eeg

Postboks 1

5293 Lonevåg

Hosanger 21.mars 2022

Søknad om tildeling av tilskot til privat barnehage jfr forskrift om tildeling av tilskudd til private barnehager

Me ynskjer å starte ein montessoribarnehage på Osterøy. Styreforma vil vere ei stifting som skal drifte ein barnehage basert på montessoripedagogikk. Det er ikkje etablert noko formelt eigarskap endå. Me ynskjer fyrst å få godkjent søknaden om driftstilskot. Stiftinga vil vere ein ideell organisasjon utan profitt.

Me har lenge hatt ynskje om å få ein montessoribarnehage på Osterøy, då me meiner dette er eit viktig tilbod som kommunen manglar. På grunn av barnehagestrukturen som har vore, har me ikkje sett korleis dette skulle la seg gjere. Me har heller ikkje hatt ynskje om å øydelegge eller skapa konkurranse for Mjøsdaalen barnehage. No når denne barnehagen skal leggjast ned, ser me ein moglegheit til å kunne etablere eit slikt tilbod. Det vil vere viktig både for å ivareta intensjonen om ei levande bygd og om ein levande skule. Med bakgrunn i vedtaket frå Osterøy kommune sitt budsjettvedtak 08.12.21, om at Mjøsdaalen Barnehage skal leggjast ned frå hausten 2022, ynskjer me difor å etablere barnehagedrift i deira lokale frå 1. august 2022.

Me ynskjer å ivareta kommunen sin intensjon om at foreldre skal kunne velje å søkje seg til det pedagogiske alternativet og organiseringa som dei meiner er det beste for sitt barn jfr Barnehagebruksplanen 2021-2030.

På Osterøy har barn i skulealder fleire pedagogiske alternativ, mellom anna montessoriskular eller skular tufta på eit kristent livssyn. Slik me ser det, har ein ikkje det same pedagogiske mangfaldet i barnehagetilbodet, og foreldre har ikkje same moglegheit til å velje det dei meiner er det beste for sitt barn. Rett nok kjem det fram av Barnehagebruksplanen 2021-2030 at den enkelte barnehage har sitt pedagogiske satsingsområde, men føresette som meiner at det beste for barnet sitt er eit montessoripedagogisk utviklingsløp, har ikkje ein likeverdig valmogelegheit i Osterøy kommune.

«Osterøy kommune har ei målsetting om høg pedagogisk kvalitet i barnehagetilbodet. Vi har eit mangfald i storleik og organisering av barnehagane, og den enkelte barnehage har si pedagogiske satsing. Dette gjer at foreldre kan velje å søke seg til det pedagogiske tilbodet og organiseringa som dei meiner er viktig og riktig for sitt barn».

(Barnehagebruksplanen 2021-2030)

Montessoripedagogikken er anerkjend, ikkje berre i Noreg, men og i resten av verda. Montessoripedagogikken er ei heilhetleg utdanning som følgjer barnet frå fødsel og inn i vaksenlivet. Montessoribarnehagen er såleis ein sentral del av barnet si utvikling. Ein barnehage med montessoripedagogisk fundament er i dag ikkje eit tilbod i kommunen og foreldre har med dette heller ikkje same moglegheit til å velje det dei meiner er det beste for barnet.

Etter FN - konvensjonen er barnhagemyndigheitene forplikta til å leggje stor vekt på barnet sitt beste. I tillegg har Stortinget lagt til grunn at lokale barnhagemyndigheiter skal ivareta ansvaret for å leggje tilrette for eit barnhagetilbod i samsvar med brukarane sine ynskjer.

«Ved alle handlinger som vedrører barn, enten de foretas av offentlige eller private velferdsorganisasjoner, domstoler, administrative myndigheter eller lovgivende organer, skal barnets beste være et grunnleggende hensyn.»

(FN's barnekonvensjon art. 3. nr 1)

Montessori Norge viser til positive erfaringar i kommunar der ein har både montessoribarnehage og montessoriskule, og at dette bidreg til eit breitt og godt opplæringstilbod. Det er særleg viktig med montessoribarnehagar i dei kommuner der det allereie er etablert montessoriskule, slik at ein kan tilby eit heilhetleg utviklingsløp. (Nina Johansen, Montessori Norge)

I fylgje Barnehagebruksplanen 2021 - 2030 er barnehage ei viktig satsing for å gjere Osterøy attraktiv som bustadskommune og at ein ynskjer å få utflytta ostringar til å etablere seg heime att. Kommunen påpeikar at arbeidet med dette må byrje i barnehagen og at det er viktig at plasseringa av barnhagane er praktisk for foreldre med levering og henting i barnehagen.

Me er samde i at for å få utflytta ostringar til å etablere seg i kommunen, er barnehage eit viktig satsingsområde. Plassering av barnhagane må vere føremålstenleg i forhold til henting og levering av borna, og bør liggje tilgjengeleg langs aksa mellom bustad og arbeid.

«Overskot av barnehageplassar bør såleis liggje langs aksa der folk ferdast på veg til og frå arbeid og skule, og kan slik ta unna auka behov for barnehageplassar for heile Osterøy og sikre ein fleksibilitet i tilbodet. Plasseringa av barnhagane er såleis viktig for at det skal vere praktisk for foreldre med levering og henting i barnehagen.»

(Barnehagebruksplanen 2021-2030)

Dei tre største bedriftene nord for Lonevågtunnelen har åleine meir enn 150 arbeidsplassar, og ein montessoribarnehage i Hosanger vil liggje langs aksa der folk ferdast på veg til jobb og skule. Det vil såleis vere upraktisk at alle som arbeider langs aksa, anten må til Lonevåg eller Fotlandsvåg. Me er samde med kommunen i at barnehagen i Mjøsdaalen har ein viktig funksjon i bygda, og har eit godt samarbeid med Hosanger Montessoriskule. Med tanke på at det er ynskjeleg med levande bygder, at ostringar i etableringsfasen skal flytte

heim og at barnehagane må liggje langs aksen på veg til og frå arbeid og skule, meiner me at det er avgjerande at det fins ein barnehage i bygda, i tillegg til skulen.

«Det er viktigare og meir realistisk å arbeide for å få utflytta ostringar til å flytte attende, enn å arbeide for nytilflytting. Ei viktig oppgåve for kommunen vil vere å leggje til rette for at dei unge vender attende til kommunen etter ferdig utdanning. Arbeidet med dette startar i barnehagen, og held fram gjennom å trekkje barn og unge med i samskapingsprosessar»

(Kommunen sin samfunnsdel 2021-2040, s.10).

I Barnehagebruksplanen 2021-2030 legg Rådmannen til grunn at barnehagane skal vere kostnadseffektive med ein struktur som er bærekraftig. Me har forståing for at talet på barnehagar har innverknad på økonomien i kommunen, og at målet til kommunen og har vore å spare pengar ved å leggje ned barnehagen i Mjøsdaalen. Vårt mål er å gje eit barnehagetilbud som ein i dag ikkje har i kommunen, og me meiner at dette tilbodet vil vere med å gjere kommunen meir attraktiv å bu i.

Me ynskjer difor:

- ein barnehage som møter føresette sin rett til å velje eit montessoripedagogisk utviklingsløp
- å møte kommunen og føresette sitt behov for ein barnehage langs aksen mellom heim og arbeid
- ivareta valet om ein liten barnehage
- å drive ein kostnadseffektiv barnehage med ein bærekraftig struktur
- å bidra til at Osterøy kommune blir ein attraktiv kommune å flytte attende til

Med venleg helsing

Initiativtakarar for stifting av montessoribarnhage i Mjøsdaalen

ved Laila Fanebust Helle